

激罕晒朱智賢合照

被親友追問婚期 謝東閔：冇咁快

甚少公開放閃的謝東閔，激罕於情人節在社交網上載與女友朱智賢的恩愛合照，即傳二人好事近。昨日他出席劇集宣傳活動時，笑言有被親友追問婚期，但相信不會在短期內發生，若有好消息必定會公告天下。

謝東閔、孔德賢、吳嘉儀與黎燕珊等昨日到將軍澳電視城，出席劇集《本尊就位》宣傳活動。該劇將於周五大結局，首次做男一的孔德賢表示對觀眾反應感到驚喜及開心，知道香港和內地都有人討論。同樣首次擔正的謝東閔對劇集成績感開心：「見到網上同身邊同事都話好睇、睇得開心，所以之前拍攝辛苦都唔記得喇。女友朱智賢都有睇，話我演番自己都係咁難煮。（覺得係讚定彈？）梗係眨我啦！」對於女主角陳嘉慧最後都未有參與劇集宣傳，二人希望她之後可帶BB出來見大家。

吳嘉儀派利是失預算

提到情人節謝東閔在社交網上載與朱智賢的合照放閃，被傳好事近，他笑言：「之前出席袁偉豪團圓百日宴，俾好多人追問係咪今年拉埋天窗，我都唔知，應該唔會住嘞，冇咁快。（求婚未？）如果結婚我會公布。」他又透露近日為愛犬的病而煩惱：「之前安排隻狗去剝牙，佢17歲喇，做完手術過一排隻牙又有事，再睇第二個醫生，原來之前個醫生連隻狗有幾多隻牙都寫錯，仲

要不停推卸責任，所以我諗住追究！」更考慮報《東張西望》。

首年派利是的吳嘉儀笑言派了5位數，大失預算：「我已經預多咗，但因為身邊好多朋友都有小朋友，所以唔夠派，尋晚仲要去撲銀紙，好彩有同老公Claim錢。」曾哭訴遭老公趕出家門的她，被問是否已雨過天青？她笑言：「我好迷信，之前有風水師話我哋一個火一個木，命格相剋，困喺一間屋會燒起嚟，要多外出，今年新年去咗好多廟宇祈福，之後打算兩家人一齊去海南島旅行。」



謝東閔專心工作，暫時不想結婚。



黎燕珊（左）與吳嘉儀一齊派韓式心心。



謝東閔與朱智賢感情穩定。



《本尊就位》一眾演員落力宣傳。

戴二千萬元行頭勁緊張 郭柏妍呻冇男士送首飾

無綫小花郭柏妍與劍擊運動員張小倫昨日為下周舉行的「珠寶雙展」試戴珠寶首飾，郭柏妍佩戴一套翡翠首飾價值二千萬元，她表示未戴過如此貴重的珠寶：「行出嚟心情好緊張，好想擁有，只可惜自己買唔起。」問到會否想男士送首飾？她笑言想有這樣的男士出現，但未有人送之前，會靠自己努力去買。她透露將拍新劇《麻雀樂園》，現實中雖打過麻雀，但不算精。提到之前她在賀年節目當主持，她表示有欣賞《亞洲超星團》參賽者演出，問到是否支持緋聞男友丁子朗？她說：「公司藝人都支持。（你避談丁子朗？）冇避，直接講，今年工作試咗好多新嘢，今日又試新嘢好開心。」

張小倫亦有佩戴珠寶首飾，他透露平日會戴手鍊，但沒這麼貴重。他自爆會送鑽石給太太，當年向太太求婚的戒指，更是由他親自設計。



郭柏妍與張小倫試戴珠寶首飾。

羅啟豪「糕」招冰歌迷

羅啟豪日前出席歌迷活動，跟約150位歌迷過新年。活動上，啟豪親手為粉絲製作香蕉蛋糕，又獻唱多首歌曲，儼如小型音樂會。對於要整逾百件蛋糕，他笑言：「因為時間關係，之前幾日喺屋企預先整咗9底，現場再整4底，啱啱夠時間又夠食。」啟豪請來《中年好聲音》第一季參賽者馮志豪做主持，並與啟豪合唱《左右為難》，馮志豪開心說：「好開心，成就我哋『中一』所稱『雙豪拼盤』第一次合唱，實在令我覺得好激動、好振奮。」



羅啟豪親自炮製蛋糕。

顏志恒盼出自家品牌



顏志恒搞活動，其妻偕兩子撐場。

《中年好聲音》歌手顏志恒（Benson）前晚與過百粉絲舉行聚會，其妻和兩位兒子都來撐場。他親自寫揮春贈粉絲，獲讚字體工整。他說：「我有學過書法，只係由細到大都鍾意睇書法，會留意字體。自己寫嘅字都睇得吓，屋企啲揮春都係我寫，再加上鍾意藝術，會自己設計衫同Logo。」問到有否想過推出自家品牌？Benson表示今年願望除了推出自己的歌曲以外，亦希望擁有自家品牌，畢竟設計是他興趣，亦略懂穿衣之道，但這方向仍很遙遠。